

欽定剿平三省邪匪方略

欽定剿平三省邪匪方略正編卷一百五十九

庚申年

三月十五日

丁卯

德楞泰奏言

臣

於三月初二日

自杉木觀移營途次小溪探得各逆在江油之
重華堰屯紮佔踞關且梁沿山俱有賊匪守望
當卽督兵趕至洛陽橋山頂見對面關耳梁一
帶山包七八處賊匪基布星羅又見樹林中及
房屋內均有賊匪時隱時見隨令將領分帶馬

步兵勇由王家堰左右兩路攻搶關耳梁賊亦
分路前來迎拒我兵仰攻數次殺賊一百數十
名拾獲旗幟鎗矛甚多滿漢屯士兵勇亦有受
傷者將近酉刻我兵始行搶上又殺賊七八十
名賊敗退踞重華堰佛耳巖一帶官兵卽於三
教寺山梁紮營初三日五鼓臣督兵直取重華
堰賊已半夜遁去躡蹤趕追沿途大有擒斬由

白馬寺至黃蓮壩山下造上賊尾時已未刻極
力剿殺該逆佔住壩口捨死抗拒我兵往來攻
撲殺賊二百餘名賊匪遂向箐林口奔逃生擒
探馬頭馮林等十九名臨陣投出難民王添明
許黃氏等三十三名口是夜該逆復敢率衆偷
撲總兵李紹祖等營卡經鎗礮轟擊直至三更
後斃賊數十名始行敗退查箐林口左通金子

山下寺場可走白水若由黃檀埡而西係雁門
壩赴龍安之路旋深賊匪一屯箐林口一屯擺
子峪口一屯麻柳埡初四日臣分兵四路令阿

哈保賽沖阿溫春阿穆勒塔李紹祖馬瑜各帶

兵勇一由陳家壩左手進攻擺子峪口一由右

手進攻麻柳埡一由大路進攻箐林口臣督率

將弁兵勇由德勝山梁策應行抵陳家壩適有

口稱難民鄭添壽投赴馬前稟稱逆衆業已遁
入雁門壩而去現在箐林口只有守候賊匪三
百名並無鎗礮我來引路前去等語察其形跡
可疑卽令兵丁押帶我兵在備而進距箐林口
不遠見對面山林茂密兩邊平壩突有馬步賊
匪數千蜂擁衝出四路官兵奮勇迎剿殺賊三
百餘名三處賊匪並出往來衝盪兩時之久殺

賊四百餘名賊衆披靡敗上對面大山總兵李
紹祖騎馬被鎗擊倒步行力戰官兵乘勝搶得
箐林口擺子峪口麻柳埡三處賊卽直向白水
奔竄又被馬隊截回由大田山黃坪溝翻烟墩
嶺折回長坪勢已直趨重華堰原路生擒爲先
鋒楊正明陳國祥殺死旗手陳會張元擒獲賊
匪崔又林等一百二十三名救出難民胡棟先

楊王氏等二百十名口連日渙散者不計其數
訊明後將該犯等臠割處死獲犯及難民俱已
隨時分別辦理初五日官兵折回重華堰至兩
界石探得賊匪屯馬蹄岡一帶初六日行營二
十餘里據報馬步賊匪約有萬餘於火石壩一
帶山後埋伏臣聞報卽整齊兵力分爲四路派
令賽冲阿總兵李紹祖侍衛富僧德協領明德

穆騰厄副將倭星額叅將沈慶春李應貴遊擊
李應元都司馬渭守備周官馬元等帶領官兵
由洛陽橋進攻包家溝令阿哈保侍衛墨爾歡
保花品副總管格亨德爾叅將蒲尙佐達自祥
都司馬占魁守備袁升侯等帶領官兵由海棠
舖進攻火石堙令溫春阿穆勒塔侍衛阿納保
薩寧阿總管色爾滾委營總蘇清阿遊擊唐正

舜都司劉彪守備羅思舉虎正林等帶馬步官

兵鄉勇由牌坊壩進攻龍子觀

臣

督率侍衛達

勒精阿塔什明法依當阿西拉布克什布德楞

額副將馬瑜遊擊馬濟馬應國都司王玉龍張

應貴馬文斌守備馬光宇楊登魁屯千總木耳

甲屯把總阿圖等帶滿漢屯土官兵由大路進

攻四路齊發我兵上至火石垭口不遠賊卽自

上壓下鎗礮齊放榴石如雨勢甚兇悍官兵衝
冒直前鎗箭並發賊匪連壓四次兵勇毫不畏
避一鼓齊上殺賊百餘名而山後埋伏賊匪自
知奸計已破各處齊出盡向官兵拚命直撲經
阿哈保寶沖阿溫春阿穆勒塔等帶領吉林索
倫官兵齊力衝殺李紹祖馬瑜等又帶領各隊
漢土兵勇連環排擊殺賊五百餘名賊遂向趙

家山張官嘴 帶奔逃 臣復親率各路官兵追

殺沿途擒獲甚多索倫總管色爾滾衝入賊隊
騎馬被矛戳倒卽步行力敵委防禦蘇爾伸將
騎馬指揮賊目射倒墜馬又被兵勇矛傷當卽
生擒賊衆見此賊被擒紛紛散走由紅廟子連
翻山梁而逃我兵復又趕殺三四百名生擒僞
總兵鮮其順殲斃旗手唐士林探馬頭蘇如富

二名獲犯劉文富等二百五十三名搶獲大礮
二位馬騾旗幟刀鎗極多訊據鮮其順等僉供
墜馬者卽係冉元帥詢之該逆亦直認不諱驗
其右手果有箭傷又訊據冉添元供稱我自去
冬與線字號陳得倖黃號徐萬富青號徐添德
之徒汪瀛白號張子聰雷世旺唐向瑤五股合
夥他們因我打仗善用埋伏常得便宜要我管

事情願聽我號令我因川東川北無可掠食要
過嘉陵江由龍安到陝甘地方與彼處幾股會
合正月十五夜偷渡搶船過江所擄之人日多
共有三四萬人不想幾次打仗好戰手頭目都
被官兵殺傷我弟添恒亦被鎗斃我右手受有
箭傷線字號陳得俸又被拿住今只有張子聰
徐萬富汪瀛度向瑤雷世旺五人管事都是無

用等語查冉添元一犯在衆首逆中最爲兇悍詭譎故各股推爲主帥聽其號令五年中橫行川東川北近復蹂躪於江之西十數州縣荼毒生靈而其屢次戕害大員官兵肆行殘暴以致黨與數萬久爲神人共憤臣入川旬餘因該逆兇惡素著時刻留心此次五日四戰歷破其奸殲其醜類知其擄掠人多故於每次打仗令各

官兵宣示

皇仁被難良民投出免死且給以口糧盤費歸業倘
若執迷不悟將來玉石不分後悔無及其中渙
散者亦復不少乃該逆等猶敢設伏決戰幸圖
苟延殘喘仰仗

皇上福庇將士用命得以生致

闕下實足彰

國憲而快人心川西除此首惡各股失所依附愈
形膽喪魂消臣惟有乘勝前驅將各股賊匪剿
撫兼施以冀速清川西上紓

宵旰至再添元於訊供後卽派員檻送魁倫處轉解
省垣使各州縣鄉村知冉逆又被生擒藉以安
定民心並可震懾匪徒恭候

命下再行解京僞總兵鮮其順等嚮割示衆獲犯劉

文富等分別辦理其屢次打仗之滿漢屯土官
兵鄉勇容俟查明另行奏請

恩慈鼓勵連日剿賊員弁兵勇內受傷者不過十數
名亦未查明另行咨部辦理奏入

上諭內閣曰冉添元等各股賊匪在江油之重華堰
屯紮占據關耳梁一帶山包又於樹林房屋內潛
行設伏經德楞泰派兵進擊賊匪敗退佛耳巖垭

潛匿箐林口令其夥黨假充難民詭稱賊衆已遁
入雁門壩欲誘我兵墮其計中經德楞泰窺破預
令我兵準備而進行抵箐林口突有馬步賊匪數
千衝出官兵奮勇迎剿將賊匪痛加殲戮賊匪復
竄回重華堰原路德楞泰卽督兵折回追剿又在
馬蹄岡火石埡一帶鼓勇奮擊先後殲擒賊匪二
千餘名生擒首逆冉添元並各股賊目傷總兵鮮

其順等餘匪由紅廟子翻山竊竄實爲將士同心
奮力所辦可嘉之至此皆

上天

祖

考垂佑兵勇効力擒此巨惡川西民生得安曷勝感慰
德楞泰此次帶兵入川連獲勝仗今又五日四戰
破賊奸計殲厥渠魁深堪嘉獎德楞泰本係二等

男爵著再加恩晉封三等子爵以示優眷其隨同
帶兵之阿哈保賽沖阿溫春阿穆勒塔李紹祖色
爾滾馬瑜等奮勇爭先衝鋒力戰俱著交部議敘
又射倒騎馬賊首再添元之委防禦蘇爾仲如現
係六七品官職卽著授爲三等侍衛如現係五品
官職卽著授爲二等侍衛將來凱旋後卽令留京
當差所有此次德楞泰等帶領打仗殺賊兵丁俱

著賞一月錢糧以示鼓勵其餘如尚有奮勇出力
之員弁等並著德楞泰查明續行具奏候朕加恩
上命軍機大臣傳諭德楞泰魁倫曰德楞泰此次帶
兵入川連獲勝仗今又五日四戰殲厥渠魁深堪
嘉獎已另旨加恩矣至冉添元係著名首逆最爲
兇悍詭譎且曾經戕害大員實爲罪大惡極今已
擒獲焉知非被賊戕害之忠魂毅魄熱助官兵所

致但身受多傷若復解京倘中途病斃轉得倖逃
顯戮現在德楞泰已將該犯解交魁倫處著魁倫
於解到後卽照前次額勒登保擒獲王登廷之例
書寫被害之朱射斗等牌位將再添元衛割致祭
以慰忠魂而伸衆憤如再添元業已解赴成都卽
著魁倫傳知先福令於省城照此辦理現在川西
剿敗餘匪翻山窮竄而德楞泰兵威大振乘勝追

剿自可一鼓撲滅一俟川西肅清德楞泰卽帶勝
兵前赴川東川北將各股賊匪一律殲除再赴陝
省督剿竄匪剋日成功以副委任至賊首徐添德
尙未就擒據廣興奏該逆於搶渡嘉陵江後因生
日飲酒作樂是徐添德必在川西奔竄何以並未
查明下落德楞泰務須將該逆設法擒拏嚴行懲
辦不可任其乘間漏網至德楞泰前調貴州官兵

尚未到營已能連獲大勝此時追捕餘匪現有兵
力自己足資剿辦而陝省賊股尙多需兵甚緊並
著德楞泰酌量情形如所調黔兵竟不需用卽令
阿哈保李紹祖全行帶領速赴陝省協剿倘川西
尙須此項兵丁卽酌留二三千其餘卽令阿哈保
等遵照前旨帶赴陝省協同恒瑞等剿賊以期迅
速集事再前此賊匪由定遠縣搶渡嘉陵江係由

該縣孫熙防堵不力業經魁倫奏明將孫熙撤回
審訊至今並未奏到今閱冉添元供詞該匪於正
月十五日到合州因該處人家俱在過節卽糾合
賊衆於夜間梟水搶船過江可見孫熙在該處並
未防堵並著交德楞泰據實查明嚴叅治罪

同日長麟奏言

臣

查額勒登保那彥成所追之

高家營賊匪較之別股賊匪奔竄尤爲迅速額

勒登保那彥成竭力連夜追剿於二月二十九日趨行一百八十餘里三月初一日趨行一百五十餘里卽於是晚與賊接仗初二日又與賊匪接仗官兵實屬認真出力卽伏羌岷州鞏昌等處各百姓無不悅服懽呼現在此股賊匪已竄赴漳縣一帶額勒登保那彥成又復帶兵緊躡賊蹤馳往會剿並派委廣厚察看賊蹤總在

逼近賊營之西北一帶隨處堵截自不難剋期
殄滅再三月初一日據鞏昌府知府朱爾漢暨
百姓等在府城內外先後拏獲賊匪三名一名
梁國相一名張喜一名甘三度臣親加審訊確
係賊夥奸細來城探聽虛實並欲乘空放火當
卽正法又於三月初二日在鞏昌府二十里鋪
地方盤獲被裹難民董文舉等十人俱係川楚

口音訊據供稱實係被裹難民乘空逃出欲赴
州縣請領路照回籍

臣

以爾等川楚匪徒從賊

日久焉肯來至甘省頓思悔過據供我們川楚
難民因來甘省口音不對恐被盤獲殺戮所以
不敢逃出賊營三月初一初二等日經畧叅贊
打仗傳令兵將高聲疾呼不拘何省被裹難民
速行逃走官如拏獲斷不殺戮並酌給盤費路

票遣令回籍等語我等竊敢逃出是實並據廣
厚報稱在山內一帶截賊沿途有賊營逃出川
楚難民甚多俱經該司給予路票釋放回籍適
與上處所獲難民供詞相符除將董文舉等十
人一體給予盤費路照遣令回籍外臣思賊營
被裹難民一聞兵將高呼赦以不死卽肯紛紛
逃出若卽乘此機會趕緊刊發告示再將

皇上節次特降剿撫兼施

恩旨重言宣布各難民或俱聞風逃散則賊勢愈孤而蕝事可期迅速當卽遍處出示明白曉諭並

照抄多張飭發陝西一體張貼

臣

惟有欽遵

諭旨督率司道府等趕緊辦理糧餉以濟軍儲

長麟又奏言

臣

前因甘省大兵雲集請將解送

川陝餉銀內分撥六十萬兩以濟急需仰蒙

聖恩俞允茲據二等侍衛車林保押解餉銀三十萬

兩於二月二十五日解到鞏昌又據候補道府

元福押解餉銀三十萬兩於二十五日解到蘭

州均經照數兌收並無短少

臣

惟有諸事撙節

既不致軍需稍有缺悞亦不使帑項或有浮糜

倘於甘省剿捕完竣之日此項餉銀尙有餘剩

仍卽查照原奏委員解赴川陝兩省以備供支

至車森保現已遵

旨令其前赴額勒登保軍營聽候調遣候補道府元
福卽留甘省幫同辦理團練鄉勇等事

同日廣興奏言

臣奉

命來川綜理糧餉蒙

恩先後撥解軍餉五百萬兩接濟原極寬裕無如屢
經陝甘總督先後截留爲數過多除撥歸穀價

及地方經費外實在分歸三局僅止一百六十
三萬兩經臣加意撙節四月之間連魁倫先後
咨調之十八萬兩遵

旨撥解省局之八萬兩三局共用銀一百四十六萬
兩較前實爲節省萬不敢任聽浮銷現在賊竄
川西不但川東川北防兵鄉勇仍屬照常川西
用度頓添一倍加之續調黔省以及屯土官兵

雲集需費更多現在各局存銀連穀價不過二十萬兩卽京浙兩餉全數到川已不敷三月之用是以奏懇

天恩撥銀接濟並遵

旨咨調山西存餉五十萬兩以濟要需正在萬分緊急之時頃又接據陝西道員文需來稟京餉復經陝省截留二十萬兩是此次蒙

思撥解之一百萬兩實在來川者又止有二十萬兩

臣

與陝西雖係隔省同屬辦理軍需斷不敢存

此疆彼界之心但現在川省實爲喫緊該省督

撫不察事之緩急止顧寬裕應手屢將隣省軍

餉截留

臣

節次咨催置之不答況陝甘節次留

銀原爲供支大兵之用卽如額勒登保赴陝之

時川省將正月兵餉預行會支並帶餘銀一萬

九千兩以備缺乏此次德楞泰帶兵回川該督
又將應發之銀令川省糧員墊放不行歸款陝
省除本省奉撥餉銀不計外臣到川以後已截
川餉至一百七十五萬兩之多以致川省轉形
掣肘設或餉銀不繼將來貽誤軍需所關匪細
惟有仰懇

皇上天恩勅下陝西撫臣迅將截留兩淮京餉迅卽

再將川餉截留之事必卽刻鎖鑰嚴行治罪倘必需用何妨自行陳奏耶

上又命軍機大臣傳諭托津曰廣興奏現在川省各局存銀連穀價不過二十萬兩正在急需之時復經陝西又將解川京餉截留二十萬兩節次咨催置之不答懇請飭令速行歸款等語前因長麟將撥解川省餉銀六十萬兩截留甘省台布又將川

餉截留二十萬兩當經降旨嚴飭並令將截留二十萬兩解川歸欸今據奏情形陝西屢次截留川餉至一百七十五萬之多以致各局存銀僅敷三月之用未能籌辦裕如此實陝西督撫之過非托津等經理不善又有旨嚴諭長麟等如再行截留定將伊等治罪諒陝省自不敢復蹈前轍現在撥川之山西存庫餉銀五十萬兩業經伯麟奏解起

程浙餉在廣元昭化者不日即可解到著托津於
此項餉銀解到後一面飭催核實支銷務俾源源
接濟毋悞軍行如陝西再有截留川餉之事著托
津嚴行叅奏

上又命軍機大臣傳諭陝甘四川湖北各督撫曰朕
思各股賊匪屢被殲擒勢極窮蹙近據各路奏報
賊夥自行投誠及難民由賊營逃出者絡繹不絕

正在剿撫兼施喫緊之際此次剿辦教匪非若邊
徼外域必須俟全數蕩平受降奏凱後方籌辦善
後者可比自應一面搜捕餘孽一面妥爲安撫況
此等從賊匪徒實皆赤子旣經悔罪投出貸以不
死卽當愛之如子各遂其生其撫輯之方不可不
及時籌畫現據長麟奏稱甘省自賊營逃回之川
楚難民甚多俱經給予路票釋放回籍但所給路

票止係免死憑據仍無謀生實濟因思現在亟須
安撫之人約有三等一係降賊一係難民一係鄉
勇此三項若俱籍爲兵丁則人數衆多安得有如
許營分廣爲分隸若於投出後聽其各自謀生其
有業者尙可自爲餬口之計而無業之人非官爲
經理安置得所則伊等雖去逆投順而無衣無食
何以自存饑寒日久必致故態復萌又思搶掠一

經繩以官法又恐激成事端彼時業已撤兵又將
如何辦理至鄉勇一項其團練者多係本省有身
家之人惟召募一項良莠不齊一旦散歸鄉里亦
恐未必皆有生路是安撫之方目前切宜早籌妥
辦總之有恒產者方有恒心或將查出叛產及破
賊難民絕產量爲分給或於曠閒地方如南山老
林等處可以耕種之區撥給開墾數年之內免其

納糧俟墾有成效再行酌量陞科庶各安本業不致復懷反側此三項中如絕產一項有目前查係絕產而流民逃戶日久或又歸其本土勢又難將業主地畝奪與失業之人轉使本人無所依藉至清查叛產開墾荒地頭緒紛繁均賴良有司宣力妥辦方能經理協宜著各該督撫於所屬道府州縣中遴選平日居官廉明公正實心愛民者使之

專董其事不妨將其本缺開除畧仿從前觀風整
俗宣諭化導等使之意不必另設官名各依本銜
給予廉俸俾其專心撫輯如果能盡心籌辦著有
實效該督等卽據實奏明朕必逾格施恩加以獎
擢倘辦理不善或有懈怠玩愒者亦卽嚴叅治以
應得之罪如此事有責成專於委任庶可期措置
得宜地方永臻寧謐各該督撫務須體朕軫恤流

移勞徠還定之意實力奉行一體遵照不可視爲具文有名無實仍將此旨謄黃曉諭俾衆共知各遂其安恬樂業之願

臣

等謹案閭閻當兵燹之餘待在上者還定而安集之鴻鴈之詩所以繼六月采芑而作也第恐事不豫立必俟凱旋振旅而後籌計及此則經理未允周章而災黎已不無失所

我

皇上睿謨廣遠於

指授方畧之時疊下撫綏之

詔遂生養欲不啻至再至三今因各路奏報投誠悔

罪者多復荷

溫綸亟籌安撫

揭出降賊難民鄉勇三項

諭令清查叛產或開墾官荒俾謀生計以保恒心並
專遴良有司董司其事仰見

聖主痼瘼在抱

宵旰縈懷不特拯之阽危者如登衽席卽革面頑愚
亦得身游

化宇是以氛祲一經肅清而百堵已皆安宅也

同日長麟又奏言查五郎廳地處萬山之中東

至孝義廳三百八十餘里南至石泉縣一百四十餘里西至洋縣二百六十餘里北至西安省城四百八十餘里其間層巒疊嶂道路紛歧近年來各省無業游民盤踞其中既無官役盤查又無弁兵彈壓聚不知其所爲散不知其所往是在平昔無事之時已不得不籌添營汛聯絡聲勢以鎮奸邪況現當有事之時賊匪奔竄率

皆出沒其中尤宜亟議添兵扼要路以資堵禦
且自用兵以來又招集五郎一帶無賴之徒充
當鄉勇將來剿滅賊匪大功告竣後若輩性本
强悍現又各予器械令其日習戰鬪剿捕事竣
一旦概行遣散該鄉勇等頓失生計難保其不
別生事端自不若卽於五郎設鎮令將此項鄉
勇入伍充兵繩以紀律目下旣藉資防堵將來

亦可漸就約束於扼要控制之中寓化莠爲良
之法不惟於該處形勢洵屬一舉兩得且亦與
現在欽奉

諭旨招募鄉勇入伍充兵之意相符相應請

旨如台布所奏卽於五郎地方趕緊設鎮俾早一日
辦理卽早一日受益除台布奏明先派都司職
銜黃瑞守備職銜陳大用駐守五郎挑選鄉勇

逐日訓練外倘蒙

聖恩先將該處總兵迅賜

簡放俾得董率辦理責有攸歸於事更爲有益其餘

應設將備及安置墩汛各章程容

臣

與台布另

行酌議具奏至西鄉一帶雖與四川接壤現在

賊匪奔竄率多經由此處大功計日告蒞將來

賊匪淨盡後該處地勢情形仍與昔時無異似

無庸遽改從前營制應請仍令漢中副將駐劄
漢中無庸改爲總兵移駐西鄉倘蒙

俞允所有五郎新鎮應請

欽定嘉名永資鎮守再

臣

在京時仰蒙

皇上諭及興漢鎮名目字義不甚合宜應行酌改

臣

查該處道缺亦名爲漢興道應懇

皇上天恩俯將興漢鎮漢興道一併另

錫嘉名以迓庥祥而垂久遠奏入

上諭內閣曰陝西五郎地方層巒復嶂道路紛歧奸民易於藏匿自當專設總兵大員永資鎮守以爲西安省城屏障著照長麟所請設立總兵一員賜名寧陝鎮在五郎廳駐劄其應設將備及安置墩汛各事著該督撫酌議具奏所有陝西寧陝鎮總兵員缺著劉之仁調補其興漢鎮著改名陝安鎮

漢興道著改名陝安道

欽定剿平三省邪匪方略正編卷一百六十

庚申年

三月十六日

戊辰

魁倫奏言查賊匪前此勢欲西

竄彰明江油經德楞泰迎獲勝仗仍在梓潼彰

明江油三縣交界之重華堰兩河口一帶屯聚

臣

因德楞泰所領之兵僅四千餘名而賊匪勢

衆當派李紹祖帶兵三千餘名並阿哈保所帶

之馬隊三百餘名土兵三百餘名馳赴策應又

將前派在魏城驛防守之都司蕭太和等所帶
兵丁一千二百餘名一併派赴德楞泰處聽候
調遣初四五日連據探報德楞泰於初二日追
賊至重華堰地方將官兵分作四路抄截該匪
等亦分數股迎敵自午至晚殺賊甚多賊匪潰
竄初三日又分路跟蹤追剿直過重華堰之北
賊匪不敢迎敵分路竄走官兵在張村垓等處

沿途剿殺難賊更多該匪等奔竄長坪後壩箐
林口等處該處俱係梓潼所屬東北通梓潼武
連驛西通龍安江油一帶初四日官兵復與賊
匪打仗初六日又據探報賊匪於初四日經官
兵追剿自後壩折回竄至長坪初五日復奔竄
重華堰兩河口等處距張村壩四五十里是此
時賊勢雖已漸趨東北惟恐其被剿勢急捨命

分竄則防河更爲緊要所有潼河一道自龍安
江油起至合州止沿河大道計有五六百里旋
經於河灘淺涸處所設卡分防就河段曲折而
計查明綿亘實有千里其淺灘可以躡渡之所
現安兵勇防守者共一百七十四處現已募集
鄉團設卡防守究恐不足深恃是以各要隘處
所仍須酌派官兵分駐督率嚴防

臣逐日派令

備弁不時上下梭巡賊匪屢次撲河窺伺因堵
禦嚴密未得偷渡其沿河各州縣如蓬溪射洪
鹽亭三台梓潼等處亦因賊氛逼近向來只有
守城兵數十名多亦不過百名不得不量加派
撥或三四百名或五六百名以資防護至合州
爲潼河嘉陵江兩水會合之處賊匪於定遠縣
屬石板沱地方渡江之後卽赴蓬溪西充一帶

滋擾及高院場接仗後賊卽竄向南部鹽亭一路均離定遠合州甚遠而潼河嘉陵江之間兩岸相距亦一二百里至三四百里不等彼時兵力實不能遏令折回臣前在潼川時因探得賊匪有西趨江油龍安之勢所以派兵在金山驛魏城梓潼一帶堵截至德楞泰到後與臣之札亦稱截其西趨之路逼向東竄使其三面阻水

無可奔逃以爲兜圍殲滅之計但目下德楞泰
及李紹祖所帶之兵合計雖有九千餘名而賊
匪分路四竄尙不肯甘心奔往絕地至於臣所
帶兵勇除派撥防護外統計僅有一千餘名應
須於潼河上下往來以備策應所調頭起兵尙
未到齊業經節次飛催計於初十內外到齊時
卽查看情形令其由金山江油等處自西向東

相機前進與德楞泰之兵協剿現在勒保尙未
到川計其由陝帶兵當從廣元昭化劍州一路
自北而南更可迎頭剿截其續調之黔兵及土
兵等月底亦當到來彼時酌量何處就近卽令
於何處進兵似此厚集兵力數路兜圍自可將
賊匪逼至合州一帶以期一鼓殲除至川北川
東一帶統兵大員雖有阿迪斯駐紮大寧德英

額駐紮龍泉寺明興駐紮開縣許文謨駐紮達
州及分防各處將備合計所帶兵勇不下二萬
餘人但各有防守地方堵禦卡隘若令其一面
防堵一面追剿勢恐不能兼顧本月初二日接
夔州府知府言朝標夔州協副將富明阿等稟
據巫山營縣稟稱探得楚省賊匪於二月十七
日竄過興山十八日賊探已至巴東屬之龔家

橋地方等語該處距巫山縣屬之九灣子地方
不過二百里想阿迪斯德英額等聞報自當於
防兵內量行抽撥預爲堵禦

臣

現復欽遵

諭旨酌量情形將所留防河之李紹祖兵勇一千名
派令遊擊沈文同夏雲龍等帶領前往聽候阿
廸斯分派堵剿並令由大竹梁山一帶行走沿
途察探如遇有竄匪無論何股卽行迎擊查弋

十五前因鎗傷復發留於順慶調養現奉

旨令其卽留重慶府城幫同知府石韞玉實力守禦

臣當卽飛咨七十五令其由水路卽赴重慶再

臣因德楞泰處弓箭子藥短少省局趕調不及

將_臣營中現有之弓箭子藥等項差令雲南昭

通鎮標前營守備馬良柱外委把總張廷貴帶

領兵勇二百名護送解往行至沉香舖地方有

賊匪數十人前來衝突守備馬良柱當卽令兵
勇立定分出一半兵勇親自帶領預備打仗一
半交外委張廷貴保護軍火比時賊已相近馬
良柱率領兵勇人等奮勇向前鎗矛傷斃賊匪
十餘名賊方退去忽見山後復有賊匪約七八
百人擎擁而來馬良柱令張廷貴一面帶領兵
勇保護軍火速行前進隨卽迎頭與賊打仗賊

衆一齊來撲馬良柱當被矛傷陣亡兵勇亦有
數人被害張廷貴帶領一半兵勇卽由小路向
北趨行於晚間趕到叅贊大營已將軍火等項
交收明白查守備馬良柱向稱勇往曾蒙

賞戴藍翎今派令押解軍火遇賊打仗陣亡應請

旨交部議卹其隨同陣亡之兵勇等查明另行咨部

辦理

魁倫又奏言竊據知府石韞玉稟稱定遠縣在重慶府城西北嘉陵江經其境內上自南充縣交界之毛連壩起下至合州交界之何家嘴止綿亘三百餘里該縣地本荒僻兼之連年被賊民戶凋殘前歲冬間賊至縣境屢次窺伺渡河彼時賴有鄉勇三千餘名極力堵遏上年七月以後地方漸次寧謐且因經費不敷奉文將鄉

勇裁撤僅存守城官兵一百名自秋入冬亦皆
寧靜本年正月間賊匪由合州一帶竄來該知
縣孫熙於十一日聞警卽稟府請兵領餉該府
立爲籌撥而往返已隔六七日之久加以十五
夜間大雨滂沱賊匪乘虛突至江干其時船隻
俱泊兩岸賊匪詐稱逃難之民僅十餘人呼船
救渡及渡過後卽將渡夫殺斃搶奪船隻居民

均各驚慌奔避賊衆絡繹搶渡該縣聞信到彼
同一外委領兵百名實在難以抵禦僅能保護

縣城此係定遠縣石板沱地方踈於防守被賊

搶渡之實在情形等語

臣

在達州時屢飭地方

官相度緩急情形將所有鄉團壯勇應添應撤
之處據實開報核辦其時該縣以去賊甚遠未

經雇募及聞合州一帶賊警經

臣

札令召募該

縣一時不及措辦不料賊匪衆多兼值雨夜猝不及防以致搶渡過江擾及蓬溪等縣完善地方非尋常疎玩可比相應請

旨將定遠縣知縣孫熙汎升外委把總米廣一併革職於該縣河干枷號俟軍務告竣後再行發往軍臺効力贖罪以示懲儆奏入

上命軍機大臣傳諭魁倫曰據魁倫奏將賊匪逼至

合州一帶以期迅速殲除等語川境賊匪前於定遠縣石板沱地方渡江之後卽西赴蓬谿西充一帶滋擾並竄向南部鹽亭等處此時賊匪屯聚在梓潼江油附近地方距定遠合州甚遠若欲自西而東逼至合州不獨賊匪未必遽肯自投絕地且中間蓬溪西充南部鹽亭等處賊匪若果折回地方復遭蹂躪殊非善策剿捕賊匪全在相機奮擊

於何處遇賊卽於何處剿殺今渡江竄匪於江油梓潼一帶經德楞泰屢加殲戮自應乘其窮蹙之際上緊追截在潼江以東嘉陵江以西兩面阻水之處一鼓撲滅方爲妥善豈可逼向東竄復致輾轉奔逃蔓延滋擾現在德楞泰在重華堰等處追剿賊匪正當喫緊之時賊匪被剿情急難保其不乘間旁趨潼河防守更爲緊要魁倫駐劄潼河以

來督率兵勇實力堵截以待德楞泰兵到今德楞
泰屢獲勝仗魁倫已大可減罪此時惟當將河岸
悉力防堵布置嚴密以遏賊奔竄之路並將糧餉
軍火等項妥籌接濟俾德楞泰得以乘勢殲擒肅
清川西則魁倫更可力贖前愆轉禍爲福不可不
倍加奮勉也至前調之黔土兵丁尙未到齊自由
帶兵將弁行走遲緩此時勒保並未帶兵入川魁

倫不必指望此路兵力惟當卽速行文催令貴州
帶兵官員星卽前進接續到川以資剿捕再川西
賊匪在梓潼地方屢被官兵剿殺梓潼爲

文昌桑梓之鄉官兵打仗殺賊屢次克捷未必不
由

文昌默佑並著魁倫查明該處地方如本有建蓋
廟宇卽行奏明候朕御書匾額發往懸掛以昭靈

佑至孫熙等身任地方防守是其專責昨據冉添
元供明前此搶渡情形竟係該處並未防守得以
搶船渡江是孫熙等疎防玩誤任賊擾及完善地
方其罪甚重魁倫所擬罪名殊屬輕縱魁倫自因
伊縱賊渡江身獲重戾是以將孫熙等從輕定擬
自留地步魁倫同係此案疎防之人亦難議屬員
之罪昨已有旨令德楞泰嚴行查辦著魁倫卽將

孫熙米廣二人鎖拏解赴德楞泰軍營並將此二節諭旨轉行德楞泰聽伊嚴審定擬具奏至魁倫摺內所稱定遠境本有鄉勇嗣因經費不敷奉文裁撤一節此文究係何人所傳前據魁倫查奏此項鄉勇係福寧裁撤此次所稱裁撤文書是否卽係福寧所行著魁倫卽向石韞玉孫熙查出原奉文書附報進呈若伊等託詞久書遺失則顯有迴

護情弊必當嚴行跟究再魁倫奏前此派送德楞泰軍營弓箭火藥之守備馬良柱在途遇賊打仗被矛傷陣亡殊爲可惜著咨部賜卹

十七日臣額勒登保那彥成奏言查高二馬五

等股賊匪剿潰狂奔又經官兵緊追該匪等由

寧遠漳縣邊界復折至岷州之宕昌一帶向南

逃遁臣等於初八日前至角力鋪地方適據署

禮縣令方聯聚稟稱探得另有一股賊匪於初三日在該縣之稍裕鎮鐵旗寨往東之寬州鎮及沿河屯劄初四日竄入秦州高橋距秦州八十里臣等查各股賊匪屢欲尋路竄往東北西北一帶王廷詔楊開甲辛聰等股賊匪竄至東北隴州等處前經臣那彥成率兵於隴山鎮等處剿殺逼過渭河南岸其高馬二姓等股賊匪

竄至西北鞏昌等處臣等於禮星鎮河家衢等

處連次痛剿該匪等亦俱過渭河向宕昌南竄

是渭河北岸賊氛已靖今西和一帶另股竄匪

又從禮縣直趨秦州有竄往東北大路之勢關

係匪輕現在除臣等所帶官兵外其餘防堵之

兵不能恃以剿賊公同商酌臣額勒登保帶領

穆克登布安福車森保等兵勇一千六百餘名

卽馳赴秦州一帶一面攔截東北大路一面趕
緊剿洗其現由宕昌南竄之賊臣那彥成帶同
扎克塔爾綸布春桑吉斯塔爾慶成等率馬步
兵勇五千餘名仍卽跟蹤趕剿倘該匪等亦由
禮縣折奔秦州仍可會合剿辦又岱森保楊遇
春格布舍等帶領馬步官兵在成縣嚴家壩也
方將張添倫等匪斬戮五百餘名擒獲四百餘

名訊明真正賊匪王貴等八十七名均卽正法
其餘被脅難民董自良等二百五十八名均經
釋放卽從成縣徽縣追賊前至鳳縣境內

臣額

勒登保已札調原帶之岱森保楊遇春等官兵

自徽兩之東北前來秦州一帶合剿

臣

額勒登

保得伊等併歸一路共有兵四千餘名可敷剿

辦一俟甘省賊淨

臣

等仍當合爲一處同赴陝

省至廣厚帶有官兵三千餘名原令防堵漳縣
岷州一帶若賊蹤已遠此項兵力即可撤至畧
陽白水江擇要堵截所有徽縣兩當等處可通
棧道之路吉蘭泰與汪啟在彼帶兵堵截將來
卽當留於該處駐守此外兵力尙有不敷臣等

昨過鞏昌境內曾面晤長麟商議召募鄉勇會
同官兵分駐要隘認真防範其兵勇應支糧餉

責令該管道府妥協供支不得稍有缺乏奏入
上命軍機大臣傳諭額勒登保那彥成曰額勒登保
等以渭河北岸賊氛已靖而西和一帶另股賊匪
從禮縣直趨秦州有竄往東北大路之勢因商酌
分帶兵勇躡蹤追擊所辦甚是西和一帶另股竄
匪又係何賊摺內未經聲明此股賊匪自必欲與
陝賊合夥現在川西渡江竄匪屢經德楞泰剿殺

自無難迅速殲除至陝甘二省則又以陝爲重甘
省雖北距黃河上游可通晉省其西面則與番境
毗連教匪不能與之聯絡且番情强悍賊匪亦未
必敢於前往滋擾陝省則接近楚豫賊股較多且
現在西和另股之賊直趨秦州想欲竄往東北與
陝賊合夥前屢降諭旨令那彥成酌帶官兵赴陝
督剿今額勒登保已分兵馳赴秦州剿辦西和竄

匪所見甚是該處距陝不遠額勒登保將此股賊
匪剿淨後竟當帶兵就近赴陝督辦陝境賊匪惟
陝省兵力較單前此川省所調黔兵已有旨令德
楞泰酌留三千其餘卽令阿哈保李紹祖帶赴陝
省今川西賊已潰敗此項黔兵額勒登保卽可催
令赴陝兼有阿哈保李紹祖二人隨同帶兵自更
得力其現由宕昌南竄之賊則專交那彥成剿辦

矣甘省賊匪剿淨再行赴陝協剿至額勒登保既
前赴陝省那彥成惟當將甘境之賊搜剿淨盡方
可赴陝伊若將未經辦竣餘匪交人接辦豈不又
如額勒登保前在川省時剿賊未竣卽赴甘省致
賊匪有乘間渡江之事耶其甘省賊匪剿淨後防
守事宜可交與廣厚辦理責令認真防堵勿令竄
賊再行折入爲要

同日吳熊光奏言現據差探稟報楚北竄往東湖遠安兩股賊匪復折回五盤山龍王坑距南漳縣城數十里其竹谿縣闌入之賊亦已竄至洋子山大木廠等處距均州不遠并聞竹谿尙有賊匪竄入等語臣查樊人傑羅逆兩股均已折回南漳地方洋子山之賊自係苟文明一股其竹谿闌入之賊似係前在陝省安康截回之

龍紹周等就近奔竄楚境刻下湖北既有四股
賊匪竄擾俱逼近均州穀城江防甚關緊要且
江岸只有滿兵三百名開封練勇一千餘名其
餘均係鄉勇臣未便遠離且鄧州一帶本係西
南兩路適中之地尙可兼顧臣是以仍暫在鄧
州就近督率臬司完顏岱道員陳鍾琛等確探
楚北賊蹤趨向慎密防守并添派安員於襄江

上下梭織巡查提禁往來船筏等項盡靠北岸
行走停泊以免搶渡斷不敢稍涉大意至陝省
賊匪現接鎮臣田永桐等來信據探報大股賊
匪於三月初五日由鎮安屬表德鋪竄至黃龍
鋪在山陽縣正西距山陽百餘里國霖等已帶
兵駐劄山陽截剿等語臣留心訪詢聞陝省石
泉偷渡之賊本不下數千洵陽鎮安一帶山路

叢雜陝省官兵無多鄉勇又不足恃月餘以來扼要堵截尙屬不敷無暇剿捕是以賊匪日衆日多是豫省浙川盧氏一帶邊境並關緊要查兩鎮所帶官兵照舊分駐巡防並未抽撥

臣昨

昨

又將都司楊景芬所帶兵丁七百名由陡河前赴西路適中之李漫坪駐紮豫備策應現復嚴札田永桐常林等隨時察探賊匪確切趨向董

率各卡隘將弁兵丁晝夜巡查奏入

上命軍機大臣傳諭吳熊光曰現在樊人傑羅逆兩股均已折回南漳地方又洋子山及竹谿等處俱有賊匪就近奔竄逼近均州穀城其陝省賊匪亦據探報大股竄至山陽縣正西一帶是豫省西南兩路在在均關緊要不得專顧一路或致稍有疎虞吳熊光現在鄧州暫住飭令完顏岱等防守江

岸田永桐常林等於浙川盧氏一帶分駐巡防尙
恐兵力稍單不敷堵截著吳熊光隨時察看情形
多募鄉勇督率完顏岱等在襄江一帶梭織巡查
將船隻提至北岸行走並令田永桐等於西連陝
境之區分佈周密確探賊蹤扼要嚴防不可稍涉
大意致賊匪偷渡東竄爲要

二十日

王申

恒瑞奏言竊

臣

沿山行走於十三日

至子午峪口總兵觀祥帶領兵勇一千二百餘
名在彼防堵並據探報楊開甲辛聰魏姓等股
賊匪俱由鳳縣之坪木向東南二郎壩華陽一
帶奔竄鎮安之賊竄至羅家峽月西溝等處總
兵劉之仁現在鎮安剿辦副都統國霖帶兵一
千五百名在山商一帶防堵東面查觀祥在子
午峪駐劄只可兼防大峪豐峪各口惟子午峪

迤西所有潞峪黑水峪斜峪關等口無兵防守
且目下終南山內賊匪股數甚多臣恐有顧此

失彼之虞正在籌畫間接撫臣台布來信已札

商額勒登保派令提督吉蘭泰總兵索費英阿

兩路官兵馳赴峪口以顧平原頃聞索費英阿

現已趕抵郿縣斜峪關一帶似可無虞臣又札

飭觀祥索費英阿務須合心協力彼此聯絡嚴

密堵禦勿任賊匪竄出平原

臣

當卽帶兵由藍

田馳赴山商一帶會同國霖竭力剿辦奏入

上命軍機大臣傳諭恒瑞曰前因陝省賊股較多恒

瑞係西安將軍是以令其專辦陝境之賊嗣額勒

登保等亦奏萌派令恒瑞帶兵赴陝剿賊並非祇

令前往防堵今恒瑞在途旣探知鳳縣鎮安等處

俱有奔竄之賊且據稱終南山內賊匪股數甚多

自應察度緩急機宜擇要進擊乃皆置之不顧惟
知趕赴商州會同國霖堵剿豈恒瑞自甘入陝所
過地方竟未遇見一賊其所稱終南山內賊匪甚
多究係何股之賊並未聲敘明晰看來恒瑞竟係
於無賊處所帶兵前進復敢蹈從前領兵官員避
賊惡習恒瑞自到軍營數載以來不過隨同帶兵
雖無大過亦並未著有勞績且伊尚有從前欸蹟

現在朕處存記未經宣露原係責令自贖之意恒
瑞寧不自知耶前此貽誤軍務及查有劣蹟之宜
綿景安永保等俱經分別治罪特以恒瑞帶兵尙
無貽誤是以姑容至今此時恒瑞若能自知愧懼
奮勉出力尙可仰邀恩典倘因循觀望惟知在商
州駐紮株守則又蹈七十五阿迺斯之故轍或被
經畧叅劾或經朕看出必當重治其罪宜綿永保

等卽其前車之鑒不可不慎現在恒瑞自己早抵
商州著將該處防堵事宜專交國霖辦理恒瑞卽
帶兵自東而西將賊匪設法搜捕至南山屢經賊
匪竄擾無可掠食自不能在彼久存勢必向山外
奔竄恒瑞應先於平原要隘處所妥爲布置攔截
卽帶兵入山奮力擊剿或將賊匪轟出平地兩面
夾擊並將各股竄匪以次殲除方可立功自贖不

得再有延玩自干重戾至前調貴州官兵目下甫
能到川來陝尙需時日恐緩不濟急昨已有旨令
額勒登保在秦州剿竣賊匪卽帶兵赴陝是額勒
登保離陝較近恒瑞卽飛咨額勒登保或先派官
兵赴陝協剿以期迅速集事

二十一日

癸酉

魁倫奏言賊匪竄渡嘉陵江以後

川東川北地方惟東鄉太平等處間有零星餘

匪游奕經

臣

嚴飭各該管文武員弁督率兵丁

及鄉團各勇實力剿捕茲於初八日接據保寧

府知府德福稟稱轉據署巴州知州田文煦稟

報二月十八日有鮮大川杜應杰等帶領三四

千人由東鄉竄入巴州經堂寺一帶滋擾隨又

據百丈關巡檢鄭幹面稟探得賊匪已由巴州

通江竄入南江之沙河子地方又於初九日接

據太平總理同知淡士灝並太平營都司李廷
臣稟稱有賊匪一股約二千人於二月二十八
日由陝西紫陽之麻柳十三壩翻山竄入太平
縣屬城口黃溪河鍋耳灣一帶賊目係龍紹周
等語又初十日接據署新寧縣知縣趙華稟稱
有王三槐餘匪一股賊首湯姓約千餘人由東
鄉縣屬芭蕉場竄往蓮花菴平灘場一帶三月

初三日遶至梁山縣屬之土門子初四日轉至

新場

臣

查此三股賊匪或係剿敗餘孽或由陝

楚折回旣在川北一帶滋擾急應設法剿捕各

州縣防守之兵旣單卽鄉團各勇僅堪自守於

剿擊亦難得力

臣

現守潼河不能分身前往而

臣

營官兵無多亦不能再行分派前奉

諭旨以川北僅有阿廸斯一人

命臣

酌量情形稍分兵力派撥鎮將管領赴川北一帶地方協剿當將所留防河之李紹祖原帶兵勇一千名派令遊擊沈文同夏雲龍等帶領前往大寧聽候阿弼斯調遣並令其由大竹梁山一路行走遇有竄匪卽行迎擊復查有副將永寧等原帶官兵一千四百餘名防護後河羅丈壩等處運道前因該處糧站已撤照會駐防達

州之總兵許文謨就近酌量派剿東太一帶餘

匪茲因巴州南江一帶需兵剿堵

臣

權衡緩急

已飛札令該副將永寧等卽於所帶兵內派出

一千二百名交叅將李芝榮遊擊那寧阿管帶

又太平縣原有防兵一千一百餘名內除酌留

五百名協防城池外撥出六百餘名與李芝榮

等所帶之兵合爲一隊並查現防太平之叅將

楊秀曾任總兵久歷戎行聞其向來帶兵打仗頗稱勇往卽將此路之兵一千八百餘名令其統領前赴巴州南江一帶相機剿捕至原駐後河羅文壩等處之兵除分撥外僅存二百餘名派往營山縣一帶接護軍餉未免稍單因札令許文謨於留養達州之病愈各兵內挑出數百名仍交副將永寧管領接護軍餉初十日准阿

迪斯咨送摺稿內稱將兵勇二千三百名交總
兵德英額設卡防範自帶滿洲官兵六十餘名
綠營兵丁五百餘名卽日馳赴臣營一同進剿
等語查川東一帶路通楚北防範最關緊要臣

先於本月初二日接據夔州府知府言朝標夔
州協副將富明阿稟稱探得楚省賊匪於二月
十八日至巴東屬之龔家橋嗣復接該知府副

將稟稱此股賊匪現竄巴東東湖兩縣接壤之
水月寺遇陽坪地方初八日又接總兵德英額
稟稱接據湖廣宜昌鎮總兵王凱來字云二十
六日接倭總督照會賊匪由房縣郎坪出蔣口
竄入保康地界勢欲仍走上年自楚折竄入川
舊路等語查上年賊匪自楚折竄入川係由保
康歸州羅坪經龍泉寺黃羅傘等處德英額現

在帶領兵勇自界嶺移赴黃羅傘地方堵守

臣

已飛札嚴飭並令分佈龍泉寺觀音巖夜叉巖
黃草坪等處之各營卡員弁嚴密防守設有賊
匪闖入卽行迎頭截擊至阿廸斯自大寧前來
必由大竹梁山一帶行走

臣

前派去之兵一千

名卽令其由此路前赴大寧計期已當會合今
據署新寧縣趙華稟報湯姓一股賊匪約有千

人現在梁山縣屬滋擾正是阿迪斯來路阿迪
斯自應將帶來之兵五百餘名暨_臣處派去之

兵一千名就近剿擊若賊匪向川北一帶敗竄

卽行追剿或與叅將楊秀之兵會合更可併力

剿辦此時竟可不必前赴_臣營_臣已飛咨照會

辦理

同日勒保奏言_臣白鳳縣起身之先曾經呈請

額勒登保籌撥兵將緣道路阻塞至今未接覆
旨迨至褒河一帶與台布王文雄索費英阿長
春等先後面商緣棧道時梗時通正須兵力堵
剿亦不便抽撥赴川隨卽設法偵探而行業於
三月十二日行抵廣元縣查得竄過嘉陵江之
賊共有五股藍號賊首爲冉添元白號賊首爲
張子聰黃號賊首爲徐萬富線字號賊首爲陳

得俸青號賊首乃徐添德徒弟汪瀛於去年臘
月二十四日在臨江寺合夥本年正月十五日
在定遠之石板沱竄過嘉陵江分投竄擾經德
楞泰帶兵趕到連得勝仗並擒獲首逆陳得俸
冉添元二名大挫賊鋒刻下賊勢尙屬散漫多
在梓潼江油劍州南部各境內往來奔竄大路
刻刻戒嚴急需分兵合擊逼歸絕地庶可一鼓

殲除查德楞泰已由梓潼之百瓊壩進兵魁倫
現在潼河以西扼要堵守今臣已入川境卽日

道出劍州正可帶兵另作一路相機截剿惟廣

元昭化一帶現有之兵僅敷防堵不能抽帶適

據施縉報稱已帶黔兵二千名於初七日行抵

潼川魁倫檄飭速赴金山驛聽調臣已飛咨魁

倫卽令施縉由梓潼一路而來正可在劍州武

連一帶與

臣

會合至魁倫現帶兵勇昨據開縣

稟報共有一萬四千三百名分布潼河正當防

堵喫緊不能抽撤惟內有副將張良槐等所帶

貴州兵一千數十名向隨

臣

營尙屬得力現在

施縉所帶均係黔兵正當歸併一路管領是以

咨會魁倫祇將此項官兵抽撥亦交施縉帶來

則

臣

一路此時可得兵四千名卽足以資剿辦

若行至前途探明德楞泰軍營相距不遠卽當
馳往會商將川境之賊設法兜剿以期勉副

聖慈委任均奏入

上命軍機大臣傳諭德楞泰魁倫勒保曰魁倫於額
勒登保赴甘截剿竄匪時奏明將軍務交伊接辦
當經降旨將川北賊匪責成魁倫剿捕其時魁倫
如果自揣不能勝任卽應留額勒登保在彼或奏

明另請派人接手乃竟欣然樂從情願帶兵剿賊而接辦以後於防堵事宜漫無覺察不能妥爲布置致任賊匪搶渡嘉陵江擾及川西完善地方荼毒生靈不可勝計彼時卽應將魁倫革職拿問治罪特因一時乏人接辦從寬辦理僅將伊拔去花翎革職留任魁倫自賊匪竄入川西以後知潼川地方最關緊要督率兵勇嚴密堵禦賊匪不能輟

轉奔竄俾德楞泰到後得以相機進擊屢次克捷
殲擒著名首逆多人此實魁倫之造化伊雖踈縱
於前而防守潼川尙能持以鎮靜稍有微勞前此
朱射斗失利及阿哈保被賊衝圍尙非魁倫之過
是以曲加寬貸魁倫仍著加恩以三品頂戴署理
四川總督仍帶革職留任八年無過方准開復其
不能防守嘉陵江之罪卽以此示薄懲不必交部

嚴議此後潼河防守事宜仍責成魁倫一手經理
務須倍加奮勉在潼川實力堵剿以期立功自効
倘再有疎懈或致賊匪竄越潼河必當重治魁倫
之罪不能再爲姑貸至勒保前在貴州本有功勲
去年任經畧時惟知株守達州任聽各股賊匪往
來竄擾是以將伊革職治罪而辦理地方事務尙
無大過較之魁倫縱賊殃民之罪更相懸絕前已

降旨加恩釋放授爲藍翎侍衛暫署成都將軍印
務現據魁倫奏川北地方有鮮大川杜應杰等賊
匪由東鄉竄入巴州而大平縣屬城口黃溪河一
帶亦有賊目龍紹周等由紫陽竄擾並有王三槐
餘匪湯姓千餘人由東鄉竄往新寧梁山等處各
州縣防守之兵甚屬單少雖經魁倫轉派叅將楊
秀等帶兵一千八百餘名前往巴州南江一帶剿

捕並飛咨阿迪斯卽在梁山土門子新場等處就近剿擊但阿迪斯怯懦無能殊不可恃近因其在
大寧株守日久惟知擁兵玩愒已將阿迪斯解任
交德楞泰與勒保會同質審此時川北一帶既有
賊匪分股竄入亟須大員帶兵剿辦勒保著格外
加恩以四品翎頂補授四川提督仍帶革職留任
八年無過方准開復現據勒保奏業於三月十二

日行抵廣元卽取道劍州前赴德楞泰軍營等語
此時川西竄匪屢經德楞泰大加殲戮勢已潰敗
且該處兩面阻水乘勢奮擊無難漸就肅清德楞
泰在彼足資剿辦勒保不必再赴川西卽當由廣
元一帶徑赴川北督辦賊匪勒保已授四川提督
川北等處皆其專管現據奏稱施縉帶領黔兵行
抵潼川已飛咨魁倫令由梓潼前進勒保卽當統

領此項兵丁或將副將張良槐所帶貴州兵千餘
一併調用務將川北各股竄匪以次殲除用副將
瑕錄用之意所有四川提督印務德楞泰不必兼
署著將印篆送交勒保接受其成都將軍印篆卽
著勒保送交德楞泰令其暫行署理現在陝省賊
匪較多亟需兵力並著德楞泰將續調貴州兵遵
照前旨令阿哈保李紹祖速行帶領赴陝協剿其

川北之賊現交勒保專辦德楞泰於肅清川西後
不必再赴川北卽當帶領勝兵前赴陝省剿辦賊
匪以期迅速集事魁倫於川西賊匪辦竣後仍當
駐紮潼川一帶嚴密防守並將被賊各州縣實力
撫綏俾臻安輯再阿迪斯前已有旨令德楞泰勒
保會同審訊如此時已赴川西卽令德楞泰遵照
前旨指出情節向其逐一詰訊定擬具奏如尙在

川北卽著勒保審辦可也